

Berbagai-Bagai Macam Orang-Orang yang Terpedaya

Menurut Huraian Imam Ghazālī

Hidup di dalam dunia ini banyak hal yang memperdayakan orang ramai. Perkara-perkara yang memperdayakan diri itu tentulah membawa kerugian kepada diri sendiri dan kadang-kadang membawa pula kerugian kepada masyarakat. Apakah jenisnya menimbulkan kita terpedaya itu?

Menuru Al-Imām Al-Ghazālī, orang-orang yang terpedaya itu terbahagi kepada empat: ulama-ulama, orang-orang yang berbuat ibadah, ahli-ahli tasawuf dan kaum hartawan. Cubalah perhatikan keterangan ahli tasawuf yang masyhur itu mengenai empat perkara tersebut seperti di bawah ini:

1. Ulama-ulama itu ada kalanya terpedaya dengan membahas hukum-hukum akal dan ilmu syariat dengan mendalamkannya.

Dalam hal itu mereka meninggalkan mendidik dirinya sendiri. Mereka itu amat jahatnya, derhaka, aniaya dan tidak mengetahui tipu daya nafsunya.

2. Ulama ada kalanya mengetahui ilmu akhlak yang batin, sedang mereka menyangkakan bahawa mereka lahir yang paling mulia pada sisi Allah, sedang mereka tidak pula menggunakanannya untuk dirinya.

3. Ulama yang terpedaya dengan fatwa hukum-hukum dan dalam persangkaan mereka: telah berkhidmat kepada agama, sedang mereka telah melepaskan amalan yang zahir dan yang batin.

4. Ulama ada kalanya bimbang dengan mempelajari *jidāl* (berbantah), tentang ilmu Kalam dan menolak syubhab yang datang kepada agama, dan mereka telah menghabiskan umurnya dalam hal itu sahaja lebih-lebih pula mereka menerangkan kepada orang ramai bahawa agama Islam tidak akan sempurna kalau tiada dengan menolak syubhab. Inilah satu kedustaan yang datang kepada umat Islam. Sahabat-sahabat pada masa dahulu telah sesak di sekeliling mereka di datangi oleh syubhab-syubhab

dan kedustaan-kedustaan, tetapi tidaklah mereka berdiri untuk menolaknya dan juga mereka tidak mahu menghabiskan umurnya untuk membicarakan itu sahaja.

5. Ada kalanya menjadi pengajar dan pemberi nasihat, tak ada cita-cita mereka melainkan hendak mencari nama dan kemasyhuran sahaja, mereka tidak mempunyai hati dan perasaan.

6. Ada pula fuqahā' yang telah berani meharuskan kepada dirinya dengan memfatwakan yang diharamkan oleh syarak, sedang mereka hanya memadakan yang zahir-zahir sahaja. Inilah sifat terpedaya yang amat besar.

Orang-Orang yang Beribadah

Ada pun orang-orang yang beribadah yang terpedaya itu ialah tentang:

1. Di antaranya orang yang meninggalkan fardū dan heboh dengan sunat-sunat sahaja.
2. Orang yang dikalahkan oleh waswas pada niat sembahyang.
3. Waswas tentang membaca huruf-huruf *Fātiḥah*.

4. Orang yang terpedaya dengan membaca Qur'an sahaja, sehingga ada yang sampai menamatkan atau khatam dalam sehari semalam.
5. Orang yang terpedaya dengan ibadah puasa sahaja, sehingga ada yang puasa terus buat selama hidupnya.
6. Orang yang asyik selalu mengerjakan haji, sedang hutangnya sekeliling pinggang.
7. Di antaranya pula orang-orang yang terpedaya dengan menyuruh dengan makruf, melarang daripada yang munkar, sedang ia melupakan dirinya.
8. Orang yang beribadah secara riak dan mencari kepujian.
- Ahli-Ahli Tasawuf**
- Ada pun ahli-ahli tasawuf yang terpedaya ialah:
1. Mereka ada kalanya terpedaya dengan berlagak sahaja sedang mereka kosong (tak mengingat apa-apa).
 2. Terpedaya dengan nama-nama pangkat dan lafaz seperti *mushāhadah, tajallī, wuṣūl* dan lain-lainnya. Mereka memperdayakan dirinya dengan berkata: "Saya sudah sampai, sedang ahli feqah, ahli tafsir, masih seperti orang awam."
 3. Ada kalanya mereka terpedaya dengan zuhud, bimbang dengan kasih dan cinta kepada-Nya. Kadang-kadang terkhayal kepada-Nya dengan bermacam-macam khayal bid'ah atau kufur, maka didakwakannya cintanya itu ialah ma'rifah (mengenal dan mengetahui).
 4. Terpedaya kerana mengkhidmati ahli sufi yang tidak ada maksudnya selain daripada mencari kemasyhuran.
 5. Terpedaya kerana menghalusi-halusi ilmu diri dan memeriksa akan kehinaannya, sehingga untuk yang demikian itu mereka telah menghabiskan umurnya dengan percuma.
6. Setengahnya ada yang telah terbuka kepada mereka, tetapi dalam hal itu datang perasaan '*ujbun* (ujub) kepada diri mereka, mereka riak dalam hal itu sehingga terhijab (terdinding) dari yang sebenarnya.
7. Setengahnya pula tiada tertegah oleh kerana riak tetapi naik lagi sehingga sewaktu dia hampir lalu disangkanya dia sudah sampai, wrang¹ itu terpedaya.

Kaum Hartawan

Kaum hartawan yang terpedaya ada empat bahagian:

1. Orang kaya yang terpedaya dengan mendirikan

masjid, rumah miskin dan sebagainya, tetapi hartanya

itu berasal dari harta yang haram lagi zalim, tiada

memberi manfaat kepada mereka walau tertulis nama mereka

di dalamnya, dan Allah tidak mengampuni dosa mereka.

2. Si kaya yang terpedaya dengan yang tersebut itu

juga, meskipun harta berasal dari yang halal,

tetapi sewaktu mendirikannya itu bukanlah semata-mata

kerana Allah.

3. Terpedaya dengan kuat berbuat ibadah, sedang

dirinya bakhil dengan hartanya.

4. Orang kaya yang terpedaya mengeluarkan zakatnya

dari harta yang buruk-buruk.

Inilah kesimpulan dari jenis-jenis orang yang

terpedaya itu yang dipetik dari kitab "*al-Iḥyā*"

karangan Imam Ghazālī.

----oOo----

¹ Perkataan sebenar ialah orang